

17 OCT 2001

APEC-CEO

DR MAHATHIR AKAN SAMPAI UCAPTAMA DI SIDANG KEMUNCAK CEO APEC 2001

Oleh: Mohamed Kamel Othman

SHANGHAI, 17 Okt (Bernama) -- Perdana Menteri, Datuk Seri Dr Mahathir Mohamad, yang dijadualkan tiba di sini pada Sabtu ini bagi menghadiri mesyuarat Pemimpin-pemimpin Ekonomi Kerjasama Ekonomi Asia Pasifik (APEC), akan menyampaikan ucaptama pada Sidang Kemucak CEO APEC 2001.

Dr Mahathir akan menyampaikan ucaptama mengenai "Globalisasi dengan Pembangunan Bersama" pada sidang kemucak di Pudong Shangri-La malam Sabtu ini.

Beliau adalah di antara lapan orang pemimpin APEC yang menyampaikan ucapan pada sidang kemucak selama tiga hari bermula esok.

Pemimpin-pemimpin lainnya ialah Presiden China, Jiang Zemin; Perdana Menteri New Zealand, Helen Clark; Presiden Russia, Vladimir Putin; Presiden Mexico, Vicente Fox; Perdana Menteri Australia, John Howard; Presiden Amerika Syarikat, George W Bush dan Ketua Eksekutif Hong Kong, Tung Chee Hwa.

Seramai 500 Ketua Pegawai Eksekutif (CEO) dan Eksekutif Kanan multinasional utama akan menghadiri sidang kemucak bertema "Abad baru, Ekonomi baru: Membangun dalam Dunia Globalisasi".

Lima puluh daripada 100 firma terbesar di China akan turut diwakili.

Sidang kemucak CEO itu adalah perhimpunan besar pertama para pemimpin perniagaan Asia Pasifik dalam abad baru ini, kata Pengerusi jawatankuasa penganjurnya, Yu Xiaosong di sini hari ini.

Para peserta akan membahaskan isu utama yang dihadapi ekonomi-ekonomi anggota di Asia Pasifik seperti tanggungjawab korporat, imbalan kecekapan dan kesaksamaan dalam globalisasi, liberalisasi perdagangan dan kesan dari kemajuan terbaru dalam teknologi digital dan kejuruteraan-bio, katanya.

Rantau Asia Pasifik mendapat faedah hasil daripada kebangkitan dalam ekonomi baru dan globalisasi sepanjang sedekad lalu, seperti ditunjukkan oleh kebangkitan sekumpulan syarikat antarabangsa termasyhur di rantau ini, kata Yu, yang juga Presiden Majlis bagi Penggalakan Perdagangan Antarabangsa China.

Antara CEO dari Malaysia yang akan menghadiri sidang kemucak itu ialah Presiden Petronas merangkap Ketua Pegawai Eksekutif, Tan Sri Hassan Marican, Ketua Pegawai Eksekutif Proton, Tengku Tan Sri Mahaleel Tengku Ariff, Pengerusi Eksekutif Tenaga Nasional, Datuk Dr Jamaludin Jarjis, Pengarah Urusan Maybank, Datuk Amirsham Abdul Aziz dan Ketua Pegawai Eksekutif Microsoft Malaysia, Butt Wai Choon. -- BERNAMA

MKO FR ZMN OS